

《一人有一個夢想》

李雪瑩

人物：叮噹，嘉誠，長毛，有成，阿愛，教授，阿男，經理，遊行人士，記者，女秘書，伙計

第一幕

場景——2046年的香港

（幕開，台的左邊是一個未來的佈景，有一張巨型椅子，而台的右邊是2004年的街道）

教授：上頭安排你一個好特別嘅任務，你快啲坐上呢張椅上面。

叮噹：請問係咩特別任務呢？

教授：我地要你坐喺呢張時光椅上，返到去2004年嘅香港，去嗰度幫我地夢境公司搵資料，我地想研究2004年香港人嘅夢境，睇吓佢地會有啲咩夢想。你嘅任務好簡單，只要將資料收集好，我地就會送你返黎，我地會一直透過呢部大電視（指著電視）睇到你嘅情況。（給叮噹一個接收器）如果你完成資料搜集後，只要向接收器講，你就會即刻返到黎，你明唔明白？

叮噹：（遲疑了一會）明白，但會唔會有危險？

教授：（肯定的語氣）絕對安全，請放心，咁你準備好未？準備好就開始出發。

叮噹：（坐在時光椅上）準備好，可以開始喇！

（教授按了幾個按鈕，叮噹便消失在2046的香港了。）

（燈暗，發出「轟轟」的機器聲）

（04年街道之場景燈亮）

叮噹：（虛弱聲線）黎咗呢度一個星期喇，仲未搵到適當嘅人選，我又唔習慣呢度嘅生活，（飲酒）唔飲酒仲可以做啲咩嘞？唉．．．．．（走到小巷裡），我成個星期無食野喇，好．．．．．好．．．．．好辛．．．．．（左搖右擺，站不穩，倒在地上）（全身發抖）

阿愛：（放學回家途中，經過這小巷）（驚覺有人伏在地上，驚訝）

（上前，輕拍叮噹的臉）

呀．．．．．喂．．．．．喂．．．．．先生，你無事嘛？先生，醒醒呀，先生？

叮噹：（發出辛苦的呻吟聲）

阿瑩：先生，你點呀？（遲疑了一會）唉！點算好呢？佢成身酒味，又醉成咁，唔通．．．．．唔通佢又失戀？唔通佢同我同病相連？失戀好慘，好痛苦嫁．．．．．（欲哭，但突然醒來般）唔得！佢咁可憐，我無理由唔理佢嘅。雖然我唔識佢，但睇佢，都唔似係啲咩壞人呀，好啦．．．．．送佢返屋企！

（把叮噹的手繞在其頸上，左搖右擺的回家，離開舞台）

（燈暗）

第二幕

場景：阿愛家中

（叮噹睡在床上，阿愛為他弄東西吃，正準備替他擦臉頰）

叮噹：（開始回復知覺，感到臉頰之濕，慢慢打開眼睛）

（慢慢看到四周景物，突然整個人彈起）

啊？呢度邊到黎嫁？你係邊個呀？點解我會喺度嫁？吓？點解？

阿愛：唔駛緊張！呢度係我屋企黎嫁，今日放學經過一條小巷時見到你訓咗喺地，你成身震曬，我嗰時都唔知點算好，所以就扶咗你返黎，我唔係壞人黎，唔駛驚！你而家身體好虛弱呀，你就放心留喺度休息吓啦，我係自己一個人住，唔會唔方便嫁！我煮咗啲粥，你唔怕難食嘅話就食啦！唔好同我客氣。

叮噹：好呀，唔該你呀！你真係好好人，今次好彩有你咋，如果唔係，我可能已經．．．．．

阿愛：傻啦，唔駛同我客氣啫！你唔好講咁多野喇，休息吓啦！

（走到開放式廚房，盛了一碗粥）

（走到叮噹旁）

你起身食碗粥先啦！暖吓個胃！我諗你都肚餓嫁喇！

叮噹：（坐在床上，吃粥）

係呢？你叫咩名呀？我叫叮噹呀，多多指教！

阿愛：我叫阿愛呀，多多指教！

叮噹：（邊吃邊說）為左報答你嘅照顧，我比一個願望你呀！你想要咩願望呀？

阿愛：傻啦，講咗就實現到咩？唔好講笑喇！都唔好笑！

叮噹：你講啦，可能我真係幫你實現到呢！信我一次啦！

阿愛：你咁．．．．．好啦！我想同我鍾意嘅人一齊。唉．．．．．我剛剛同佢分左手呀，我真係好唔開心，日喊夜喊，就算我返學上緊堂，我都只係識得喊，考試我都溫唔到書，我可能要留班呀！但無咗佢，我真係乜都做唔到，日日都望住個電話，希望佢會打返比我，電話一響，我就好期待打黎嗰個係佢，但．．．．．（開始忍不住哭）每次都係空歡喜一場，好失望。就算我沖緊涼，我都會喊。好多時夜晚訓訓吓覺，都會扎醒左，睇吓個手提，佢會唔會打過俾我呢？會唔會我訓咗聽唔到呢？會唔會佢太忙唔得閒搵我呢？我好天真咁以為佢會搵返我，但點知．．．．．一日復一日，我真係好辛苦，好掛住佢！點解佢唔要我啫？雖然我有時會發吓啲大小姐脾氣，但我已經對佢好好，真係好好，佢話點就點，佢要我做咩就做咩，佢好大男人，咩都唔比我做，就

算同朋友出街，佢都唔比，我只係日日等佢搵我，但我都聽曬佢話，即使佢揮之則來，揮之則去，我都無怪過佢，因為我真係好愛好愛佢，我真係唔可以無咗佢！無咗佢，我真係好似無咗靈魂嘅軀殼咁，做人無曬目標，無曬方向，我嘅世界就只有佢，因為佢我已經無咗好多朋友，我真係好辛苦，好想死．．．．．你知嘛？愛情就係我嘅一切，無咗愛情就等如咩都無曬，我真係好愛好愛佢，我咩都唔要，我只係要佢咋，我要．．．．．佢．．．．．我想同佢一齊返！

叮噹：唔好唔開心啦，佢聽日就會搵返你嫁喇，信我啦！

阿愛：傻啦！都無可能，（激動）無可能嫁喇！（冷靜一會）算啦，你早啲休息啦，我都去訓喇！

（燈暗）

（翌日早上，門鈴響，發出「叮噹叮噹」的聲音）

（阿愛起床開門）

阿愛：（無力的說，眼只半開）邊個呀？

阿男：（手執鮮花）送比你嫁！

阿愛：送比我？乜．．．．．乜你唔係唔愛我，要同我分手嫁咩？點解．．．．．

阿男：傻豬！邊有啲咁嘅事喎，我愛你呀！

阿愛：真嘅？

阿男：係呀！

（阿愛聽後攬著阿男，阿男吻了她額頭）

阿男：傻豬，我要去返工喇！我今晚再搵你啦！

阿愛：你話嫁，唔好呃我呀！

阿男：遵命！

（阿男上班，阿愛關上門）

阿愛：（興奮地大叫）叮噹，我好開心呀，知唔知點解呀？佢呀，佢黎搵我呀，佢話佢愛我，佢話唔係同我散呀！你睇吓，（把花拿到叮噹眼前）係佢送俾我嫁！第一次咋！佢第一次送花比我咋！

叮噹：而家信我啦？

阿愛：我信喇！我信喇！多謝你呀，叮噹，我真係唔知點感激你！

叮噹：唔駛！就當係報答你呢幾日以黎嘅照顧囉，但你要應承我，唔可以將呢件事同其他人講，得唔得？

阿愛：得！得！我應承你！

（門鈴又響）

（阿愛開門）

阿愛：咦？係你？

嘉誠：係呀，唔歡迎？

阿愛：緊係歡迎啦！入黎啦！

（嘉誠進屋，阿愛與他回房中，二人坐下）

嘉誠：我地知你唔開心，所以我地約好咗黎你屋企陪你，佢地遲少少就會到嫁喇。

阿愛：嘻，我都無唔開心。（露出甜蜜笑容，撫摸著長髮）

嘉誠：（古惑眼神望向阿愛）咦咦！你有啲野嗰！究竟發生咗咩事？快啲話我知呀！

阿愛：（嬌滴滴的說）嘻嘻！今日呀，佢黎搵我呀，佢話愛我，佢話佢唔係唔愛

我呀，佢仲送咗花比我呀！同咗佢一齊咁耐，佢第一次主動搵我，第一次送花比我咋，佢今次搵返我，真係成個人唔同曬呀，我而家真係覺得好開心，好幸福呀！我等咗佢咁耐，終於等到喇！真係好似發緊夢咁。

嘉誠：吓？點解會咁嫁？佢發生咗咩事呀？轉性？

（阿愛欲說話，但門鈴響，她去開門）

（長毛，有成站在門外）

阿愛：你地黎喇？嘉誠一早到咗喇！

（三人回房）

嘉誠：乜你地咁遲嫁？

長毛：唔得呀？吹咩？

有成：對唔住呀！公司多野做，所以遲咗。

阿愛：算啦！唔緊要啦，做野緊要嘛。

嘉誠：哈哈！傻啦，人地阿愛姐心情咁好，點會因為你地呢啲閒人而唔開心呀，可，愛姐？

（阿愛不語，但露出微笑）

有成：咦？我地好似黎遲咗咁啱，究竟發生咗咩事？

長毛：係啱！好講喇啱！

嘉誠：阿愛個男朋友變咗絕種好男人啱，轉死性，今日仲送花比佢呀，太陽真係由西邊出黎喇！佢地無事喇，我地今次真係黎錯咗喇！（停了一會）係啱，你仲未話我知點解佢會突然轉性啱？

長毛，有成：係囉！講啦，我地都好想知道呀！

阿愛：講比你地聽都得，但你地要應承我，唔可以講出去嫁，得唔得先？

三人同答：好啦！咁快啲講啦！

阿愛：我早幾日喺街度見到個男仔暈咗，咁我見佢咁慘，又成身酒味，所以咪送咗佢返屋企囉，點知佢話要報答我照顧佢，話要比個願望我，咁我咪講話我想同返佢一齊囉，點知佢好似識魔法咁，我男朋友真係搵返我，仲對我好過以前好多添呀！都係因為佢，我先可以同返我男朋友一齊咋！

三人同答：咁奇怪？佢仲喺度？介紹比我地識啦！我地有野想佢幫手呀！

阿愛：（有難言之隱地說）但係．．．．．我應承過佢唔同人地講嫁，我驚．．．．．

三人同答：（搶著說）唔怕啦，有咩事我地負責，得未？

阿愛：（猶豫一會）咁．．．．．好啦。

（四人出房門，到叮噹前）

阿愛：（尷尬地說）叮噹，對唔住呀，因為我開心得濟，唔小心將你幫我件事講咗比佢地聽呀。對唔住呀！我無心嫁！

叮噹：唉！我叫咗你唔好同人講，你應承過我嘅野都做唔到，我最憎人講大話，無口齒，我知道佢地黎嘅目的，我係絕對唔會幫佢地嫁！

嘉誠：（搶著說）你唔好怪阿愛啦，最衰都係我，係我迫佢講出黎嫁，你要怪就怪我啦！

叮噹：唉．．．．．算啦，唔講都講咗，你地今次黎，想點？

（眾人坐在客廳中）

（燈暗）

（燈照向嘉誠）

嘉誠：（走上台前，面各觀眾說）叮噹，我自細就生長喺一個貧窮嘅家庭裡，父

母離異，細個時因為屋企無錢，受盡欺凌，所以我細個時就決定將來一定要賺好多錢，唔會再比人睇唔起，我唔可以再比人睇唔起。我記得細個時，我見到啲同學一開學就有新校服，新文具，而我呢？校服殘殘舊舊，爛左又補，補先又爛，當時個個同學都取笑我，話我「乞兒仔」，因為嗰時我仲細，比人話完真係好唔開心，無曬自尊，成日都因為咁而喊，覺得好自卑，我好羨慕人地，羨慕人地屋企有錢，而我無．．．．．所以，我要有錢，有錢就咩都得嫁喇！而且我啲細佬妹仲讀緊書，仲要我去養，去照顧，我真係好需要錢嫁！叮噹，求你幫吓我啦，我只係想股票大升咋！咁我就可以賺大錢，一次就夠嫁喇！

（嘉誠退回座位，有成出，面向觀眾，燈照在有成身上）

有成：我係有成呀！我個願望好簡單嫁咋，我只係想事業有成。我做野都做咗好幾年，但依然原地踏步，仲係做緊一個文員仔，身邊好多同期出道嘅同事，唔係做咗經理，就已經做咗老細，有自己嘅生意，我真係覺得自己好失敗。我唔係無比心機去做，我已經好比心機去做嫁喇，我敢講，我比其他人付出得更多，但點解我依然一事無成？點解個天咁唔公平？乜唔係付出幾多，就算得唔到全部，都有一半嘅咩？我有個女朋友，我好愛佢，但因為我一事無成，收入有限，佢覺得我好無用，經常埋怨我，又話我無出息．．．．．我都想做一個事業有成，出人頭地嘅人，但奈何我有幾努力都好，我嘅事業依然停滯不前。話曬我都係一個堂堂男子漢，比女朋友話我無出息，好打擊我嘅自尊，自信心，令我同佢一齊嘅時候，根本一啲男子氣概都無，一啲專嚴都無，我唔想再咁落去喇！我唔可以再比女朋友睇小，（大叫）我要事業有成呀！

（有成退回座位，長毛出，面向觀眾，燈照在長毛身上）

長毛：仲有我呀！我叫長毛，（撥一撥自己的長髮），我要做特首，而家呢個董伯伯簡直不知所謂，咩廿三條，百萬五．．．．．唉！簡直一塌糊塗，再比佢做落去，香港遲早玩完，我真係睇唔過眼，而家我雖然做左議員，但都無用，個個都唔聽我講，唔理我，個個都以為我傻，傻個個係佢地呢班走狗呀！呢班走狗唔死無用呀，所以我要做特首，（大喊如示威般），打倒董建華，特首落台！我要做特首！

（長毛回座位，燈亮）

（四人互望）

四人同說：叮噹，幫吓我地啦，一次咁多啦，求吓你啦，求吓你啦！

(靜下，燈暗，一道燈只射在叮噹身上)

叮噹：其實我唔應該幫佢地，但不竟佢地都有佢地嘅難處，但我並唔可以真正幫到佢地，但．．．．．佢地又可以幫到我收集夢境，咁我就可以返到2046年，咁唔係一舉兩得咩？

(燈再次亮起)

四人同說：求吓你啦！求．．．．．

叮噹：(搶著說)好啦！我幫你地，你地返去訓啦，咁聽日就會實現嫁喇！

四人同說：真係嘅？

叮噹：係呀，信我啦。

(語畢，四人離去，走出舞台)

(燈暗)

(門鈴響)

(阿愛開門，嘉誠上前攬著阿愛)

嘉誠：(興奮)阿愛，你尋晚有無睇新聞呀？我炒股票賺咗好多錢呀，六百萬元，六百萬元！叮噹呢？叮噹呢？我要去多謝佢呀！

阿愛：恭喜你呀！叮噹喺房呀。

(嘉誠走到房內，攬著叮噹)

嘉誠：我真係要好好多謝你呀！我唔會再比人睇死喇，我有能力照顧到我細佬妹，我終於得咗喇，我得咗喇！

叮噹：咁你就唔好再自卑喇，知嘛？比啲信心自己！

嘉誠：(走到大門，叮噹與阿愛送他離開)

（面向二人）喂，為咗慶祝我賺錢，呢個禮拜我請你地食飯呀，叫埋有成同長毛啦，好無呀？

阿愛：好呀！我約佢地啦。

嘉誠：好啦，咁我走喇。

（嘉誠離開舞台）

（燈暗）

第三幕

佈景：酒樓內

（燈亮）

（叮噹，阿愛，長毛已坐下，傾談中）

有成：（進內，坐下）對唔住呀咁多位，今日公司多野做，所以遲咗黎。

（經理進）

經理：總裁，請問有咩吩咐呢？

有成：個計劃書做成點呀？

經理：仲未做完呀，不過好快得嫁喇。

有成：好快，好快！咁快到幾時先有呀？吓？想當年你要我一日時間裡面交個計劃書比你，交唔到你話到我一文不值，我而家都算對你好啦，比咗兩日時間你，但你都仲未搞掂？想炒呀？吓？

經理：唔敢，唔敢！我而家即刻去做，今日五點前交比你。

有成：五點，五點！！咁你仲唔死去做？

經理：係嘅係嘅，即刻去。

（離開舞台）

女秘書：（進）總裁，你女朋友今日已經搵過你好多次喇．．．．．

有成：（搶著說）你唔記得我講過啲咩喇？我叫你同佢講我好唔得閒嘛！出去出去出去，我唔想再聽到佢啲野呀！你同佢講，再煩住我，我就以後都唔會搵佢！聽到未？

女秘書：明白喇，總裁，咁我返去做野先。

（女秘書出，離開舞台）

阿愛：你做咩咁對你女朋友呀？

有成：傻啦！男仔做野，女仔跟住曬邊得嫁？女人緊係留返喺屋企啦！唔駛做呀？

叮噹：你做咩咁講你女朋友嫁？你對唔對得佢住呀？佢跟咗你十年喇！

有成：車！我而家事業有成，男人有咗事業就緊係咁嫁啦！話曬我都係香港總裁嘞，好多野做嫁，你以為做得好舒服，好開心呀？我有錢佢洗，要咩有咩，佢仲想點呀？由始至終，係佢要我事業有成嫁！係佢睇唔起我嫁！咁我而家成功啦，咁咪合曬佢要求囉，佢仲想點呀？咩都係佢講嫁！我對佢都算係咁啦！而家大把女比我簡呀，我都無咁做，佢而家應該開心先係呀！

叮噹：如果我一早知你會係咁，我一定唔會幫你呀！

阿愛：咪係囉，你好賤格囉，我係你朋友都唔幫你呀，我都唔想有你呢啲咁嘅朋友呀！

長毛：你去死啦，仲衰過嗰個董建華！走啦！拎你去打靶就啱嫁喇！

有成：超！好叻咩？走咪走！

（氣沖沖地走出舞台）

（過了一會，嘉誠進）

嘉誠：對唔住呀，遲左！啱啱啲股票經紀搵我，所以遲咗！叫咗野食未呀？

阿愛：未呀。

嘉誠：伙計，幫我叫啲靚鮑魚呀，魚翅啲做頭盤先啦！之後就幫我點啲撚手小菜黎啦，錢唔係問題，黎住十碟餸先啦！

阿愛：傻咗咩，得我地幾個人，邊駛啖咁多呀？都食唔曬，唔好浪費啦！

嘉誠：得啦！食唔曬咪算啦！得啦，我夠錢比啲！（向伙計說）上菜啦！

（伙計出）

（電話響起）

嘉誠：喂？係？得啦幫我入貨啦！．．．．．入幾多？你幫我諗啦，我大把錢！

叮噹：你仲有玩股票咩？你唔係話賺到錢就唔再玩嘅咩？

嘉誠：傻啦！錢邊有人會覺得多嫁？只會覺得唔夠嘅姐！

叮噹：一個二個都係咁，唉．．．．．

（燈暗）

第四幕

場景：左面是遊行現場，右面是阿愛家

（右面場景燈亮）

（阿愛在家中打掃）

(新聞報導聲音)

(阿愛看著電視)

(燈暗)

(左面場景燈亮)

記者：現在係特別新聞報導，長毛特首到外國參加會議，他仍然不改其作風，破口大罵各國代表官員，此舉引起各國不滿，決定禁止佢再到訪各國，並終止與香港的外交同貿易往來，這不但影響香港之形象，還令本港各市民不滿，現在維園已有數以萬計嘅市民集會，並不斷啞口號．．．．．

遊行人士：(大喊) 打倒長毛，打到長毛．．．．．

記者：而家市民情緒好高漲，再有咩進展，我地會再向各觀眾報導。特別新聞報導完畢。

(燈暗)

(右面場景燈亮)

(阿愛呆了)

(門鈴響起)

(嘉誠，有成，長毛在門外，進入)

三人同說：叮噹呢？叮噹呢？

阿愛：佢剛剛走左喇，你地搵佢做乜呀？你地唔係乜都有喇咩？仲搵叮噹做咩呀？

三人同說：我地唔再要夢想喇！

阿愛：點解呀？

有成：我之前咁對我女朋友，佢話我完全無諗過佢感受，之後佢話要同我分手呀，我而家先知道事業有成並唔重要，最重要嘅係我女朋友，即使而家我事業有成，但無咗佢，我係唔會開心嫁！

嘉誠：我都係呀，我有咗錢之後，雖然要咩有咩，仲有好多人走黎同我做朋友，又成日稱讚，抬舉我，但我並唔覺得開心，因為佢地都好假仁假義，並唔係真係想同我做朋友，而係為咗我啲錢，我唔要呢啲所謂嘅朋友呀！

長毛：唉．．．．．你地咪算好囉，好過我好多，我而家先知做特首原來一啲都唔易，你地有睇新聞都知啦，而家好多人喺維園集會，話要我落台呀！我一心想為民服務，但點知搞到而家咁，我真係再無面目見佢地喇！我唔要做特首喇！

阿愛：叮噹已經走咗喇，但叮噹一早都知道你地會後悔，唔止你，我都係呀！叮噹已經話過我，但佢話得我地啱，所有野係要靠自己去爭取先得嫁，唔可以只係空想，唔去實踐！所以佢叫我同你地講，佢只係由未來黎搜集夢境，你地而家擁有嘅一切，都只係夢境黎嫁咋！所以你地今晚訓醒一覺之後，聽日就會打回原形嫁喇！而我．．．．．我個夢已經醒咗，比你地早醒！係真嫁，我同佢，並唔係空想就得，兩個人一齊，最重要係溝通，而且唔係單方面付出就得嫁喇！我同佢已經玩完喇！（眼紅）你地返去啦！聽日就會打回原形嫁喇！

三人同說：下？夢境？

（燈暗）

第五幕

場景：2046的香港

（叮噹與在2046的香港）

叮噹：教授，我已經收集好夢境喇！

教授：結果係點？

叮噹：以我收集到嘅夢境，我地可以知道2004年嘅香港人都係追求愛情，

事業，金錢同權力，人有夢想當然係好啦，但係佢地喺追求夢想嘅過程中完全迷失咗自己，比夢想充分頭腦，被牽著鼻子走，到頭來反而損失更多，好似佢地身邊嘅親人，朋友，所以有夢想係好，但唔好只係空想，又唔實踐，更加要珍惜眼前所擁有嘅所有野，包括親人同朋友！

完